



# ILIDŽA

## INFORMATIVNI BILTEN OPĆINE ILIDŽA

Ilidža • Juni 2019  
• Broj 182





## REDOVNA SJEDNICA OPĆINSKOG VIJEĆA



### Donesena Odluka o građevinskom zemljištu na području općine Ilidža

Vijeće je na sjednici donijelo Odluku o građevinskom zemljištu na području općine Ilidža kojom se uređuju granice gradskog građevinskog zemljišta, utvrđuju zone građevinskog zemljišta, propisuju osnovi i mjerila za određivanje naknada za gradsko građevinsko zemljište, naknada za uređenje, kao i način i rokovi plaćanja tih naknada. Potreba donošenja ove odluke podrazumijeva usklađivanje postojećih akata u primjeni sa odredbama Zakona o stvarnim pravima Federacije BiH, s ciljem stavljanja u punu funkciju obuhvata građevinskog zemljišta na području općine Ilidža kao resursa od posebnog značaja za društvenu zajednicu, kao generatora privrednog i drugog razvoja šire zajednice, te planiranja sredstava budžeta Općine Ilidža.

### Edina Topalović nova članica Komisije za budžet, privredu, finansije i ekonomska pitanja

Vijeće je po zahtjevu Stranke za BiH imenovalo Edinu Topalović za člana Komisije za budžet, privredu, finansije i ekonomska pitanja umjesto dosadašnje članice Sabire Pramenković.

### Donesena Odluka o načinu i uslovima raspolaganja nekretninama u vlasništvu Općine Ilidža

Općinsko vijeće Ilidža na 28. redovnoj sjednici održanoj 27. juna 2019. godine donijelo je Odluku o načinu i uslovima raspolaganja nekretninama u vlasništvu Općine Ilidža kojom se uređuju uslovi, načini i postupci raspolaganja nekretninama u vlasništvu Općine, u vidu prodaje, osnivanja prava građenja, neposredna pogodba i uslovi za zamjenu nekretnina. Nekretnine u vlasništvu Općine, Općinsko vijeće može otuđiti samo na osnovu javnog prikupljanja ponuda i uz naknadu utvrđenu po tržišnoj cijeni, osim u slučajevima kada je zakonom drugačije određeno. Nekretninama u vlasništvu Općine u okviru svojih nadležnosti raspolaže Općinsko vijeće. Svrha i cilj uređenja ove oblasti je potreba da se šira društvena zajednica upozna sa institutom prava građana koji predstavlja odličan kompromis između javnog, općeg interesa sa jedne i privatnog, odnosno interesa investitora sa druge strane. Postojanje ove odluke daje pozitivnu, konkretniju sliku privrednog potencijala naše zajednice.

### Amar Bungur imenovan za člana Etičke komisije

Vijeće je po zahtjevu Naše stranke imenovalo Amara Bungura za člana Etičke komisije Općinskog vijeća umjesto dosadašnjeg člana Elvise Vrete zbog prestanka mandata.



## Prijedlozi akata o regulisanju imovinsko-pravnih odnosa

Vijeće je usvojilo prijedlog akata o rješavanju imovinsko-pravnih odnosa i to prijedlog rješenja o rješavanju imovinsko-pravnih poslova u svrhu legalizacije stambenog objekta po zahtjevu Kovačević Ramiza, te prijedlog rješenja Makaš Emine o legalizaciji dograđenog dijela i nadzidane potkrovnne etaže na stambenom objektu. Usvojen je i prijedlog odluke o prestanku statusa nepokretnosti u općoj upotrebi po zahtjevu Avdić Remzije.

## Informacija o realizaciji Programa rada Općinskog vijeća Ilidža za period januar-mart 2019. godine

Vijeće je na sjednici primilo k znanju i informacije o realizaciji Programa rada Općinskog vijeća za period januar-mart 2019. godine. Program rada Općinskog vijeća koncipiran je da se realizuje kroz održavanje redovnih, tematskih i svečanih sjednica. U ovom periodu Općinsko vijeće je održalo četiri redovne sjednice, jednu tematsku i dvije svečane sjednice i to u povodu Prvog marta-Dana nezavisnosti Bosne i Hercegovine i 12. marta-Dana Općine Ilidža.

## Informacija o implementaciji mjera Gender akcionog plana Općine Ilidža za 2018. god.

Na sjednici jedna od tačaka bila je i Informacija o implementaciji mjera Gender akcionog plana Općine Ilidža za period 1. juli-31. decembra 2018. godine. Komisija za izbor, imenovanje i pitanja ravnopravnosti spolova i Komisija za zaštitu ljudskih prava, predstave i prijedloge Općinskog vijeća u pomenutom periodu održale su dvije zajedničke sjednice na kojima su imenovani radni timovi za implementaciju mjera pojedinačnih strateških ciljeva Gender akcionog plana i to za Podsticanje rodno odgovornog poduzetništva, za Povećanje uključenosti građana/ki u suzbijanju i sprečavanju rodno motivisanog nasilja i za Podizanje svijesti o značaju zaštite zdravlja za ukupan kvalitet života.

## Razriješena četiri člana Općinske izborne komisije

Vijeće je zbog isteka mandata razriješilo članove Općinske izborne komisije Vanju Milidrag, Nerinu Zećo, Daraka Rimca i Ehlimanu Kurspahić.



## Potpisan sporazum u iznosu od 543.200 KM

Sporazum o sufinansiranju projekata iz Budžeta Kantona Sarajevo za 2019. godinu od namjenskih sredstava - vodne naknade na području općine Ilidža potpisao je ministar komunalne privrede i infrastrukture Kantona Sarajevo Srđan Mandić, sa direktorom Zavoda za izgradnju Kantona



Sarajevo Mirzom Hulusićem i načelnikom Općine Ilidža prof. dr. Senaid Memić 11. juna u Kantonu Sarajevo. Za Općinu Ilidža izdvojena su sredstva u iznosu od 543.200,00 KM.

U 2019. godini nastavit će se projekti izgradnje kolektora otpadnih voda iz Rakovice, sufinansiranje u iznosu od 243.200,00 KM, rekonstrukcija fekalne kanalizacione mreže u ulicama Stari drum, Halid bega Hrasnice, Vrelo i Bunica (faza II), sufinansiranje u iznosu do 200.000,00 KM, te izgradnja kanalizacione mreže u ulici Zabosnice, sufinansiranje u iznosu do 100.000,0 KM, a preostala novčana sredstva obezbijedit će Općina iz svog Budžeta.

„Općina Ilidža će pribaviti sve potrebne dozvole za izvođenje radova i riješiti će imovinsko-pravne odnose na planiranoj trasi projekta, provest će proceduru i izvrši izbor najpovoljnijeg izvođača u skladu sa Zakonom o javnim nabavkama BiH i sa istim zaključiti ugovor o izvođenju radova predviđenih projektom. Po okončanju procedure Ministarstvu će dostaviti po jedan primjerak Odluke o izboru najpovoljnijeg ponuđača i ugovora zaključenog i potpisanog sa izvođačem, a imenovat ćemo i svog uposlenika čiji zadatak će biti koordinacija aktivnosti na realizaciji projekata ovog Sporazuma. Nadamo se da ćemo projekte realizirati uspješno u interesu građana”, rekao je načelnik Memić.

„Ministarstvo je za svih devet općina izdvojilo sredstva u iznosu od 4.680.000 KM, a za četire općine s kojima ćemo danas potpisati sporazume o sufinansiranju projekata za izgradnju i rekonstrukciju vodovodne i kanalizacione mreže 2.152.900 KM. Opređjeljenje ove vlade jeste nastavak saradnje s općinama, a posebno kada su u pitanju dobri projekti koji su značajni za naše građane”, izjavio je ministar Mandić.



## Dobra saradnja, efikasnije rješavanje aktuelnih problema

U Općini Ilidža 07. juna 2019. godine je održan sastanak sa predstavnicima Službi za imovinsko pravne poslove općina u Kantonu Sarajevu. Cilj sastanka je poboljšanje saradnje između općina KS, razmjena iskustava, detektovanje problema sa kojima se u svom radu nadležne sužbe susreću, te ujednačavanje prakse na cijeloj teritoriji Kantona Sarajevo.

Zajednička ocjena svih učesnika sastanka jeste, da se nadležne službe iz oblasti imovinskih prava i katastra, susreću sa ozbiljnim problemima u realizaciji svakodnevnih radnih zadataka, zbog samog obima i složenosti takvih odnosa, ali i nedostatka odgovarajućih propisa iz predmetne oblasti. Kako je zaključeno mora se hitno reagovati prema nadležnim zakonodavnim tijelima kako bi se ista animirala u donošenju odgovarajućih zakonskih rješenja u cilju prevazilaženja i rješavanja problema sa kojima se susreće administracija, sve u cilju zajedničkih interesa građana KS, kao i drugih korisnika usluga.

- Nadamo se da će ovaj sastanak polučiti pozitivne rezultate, poboljšati saradnju između lokalnih zajednica u našem Kantonu, te da će ta saradnja omogućiti efikasnije rješavanje pitanja iz imovinsko pravne oblasti. Poseban dugoročni cilj jeste djelovanje prema zakonodavcu da stvori jedan potpun zakonski okvir koji bi omogućio efikasnije rješavanje aktualnih problema iz ove oblasti, kao jedne od najznačajnijih za privredni razvoj lokalnih zajednica, ali i cijelog Kantona - izjavio je jedan od inicijatora održavanja današnjeg sastanka, pomoćnik općinskog načelnika Jasmin Voloder.

## Tradicionalni Bajramski prijem

Tradicionalno u Općini Ilidža drugi dan Bajrama, kada se obilježava Dan šehida, načelnik Općine Ilidža prof. dr. Senaid Memić upriličio je prijem za 50 porodica, čiji su članovi poginuli kao pripadnici Armije Bosne i Hercegovine. U svom obraćanju porodicama šehida načelnik Memić se zahvalio svima na dolasku i čestitao Bajram, te istakao kako je ovo prilika da se sretnu, porazgovaraju o problemima, kako da ih riješe i učine više kako bi bol za najmilijim bar malo bila ublažena.

„Ovaj prijem samo je mali znak pažnje, gdje mi pokušavamo da kažemo da vaši najdraži i naši najdraži koji su dali živote nisu zaboravljeni. Izdvojili smo sredstva za simboličnu jednokratnu pomoć za porodica”, kazao je Memić, te dodao da Općina Ilidža izdaje velika sredstva za boračka udruženja.

„Mi smo tu za sve vaše probleme i moja vrata su vam uvijek otvorena”, dodao je načelnik.

Potom su predstavnici Organizacije porodica šehida i poginulih boraca uručili načelniku Memiću zahvalnicu za nesebičnu pomoć u radu ovog udruženja.





## Urađen Strateški plan Općine Ilidža za period 2019.-2021.

**S**trateški plan Općine Ilidža izrađen je na temelju i u skladu sa Strategijom razvoja Općine Ilidža 2014.-2020. godine, Strategije razvoja lokalnih cesta za period 2015.-2025. godine i drugim razvojnim dokumentima na lokalnom nivou, te na nivou Kantona Sarajevo. Svrha strateškog plani-



### Novih 1.740 korisnika vode

**P**rojekat vodosnabdjevanja Rakovice se nastavlja. Do sada je za ovaj projekat utrošeno oko 19 miliona KM. Sredstva su izdvojena za izradu projektne dokumentacije, rješavanje imovinsko pravnih odnosa, izgradnju vodnih objekata, distributivne i sekundarne vodovodne mreže.

Radovi na izgradnja rezervoara za vodu Stubline su okončani. Izgrađeno je 56,50 kilometara vodovodne mreže, a do sada je priključeno 1.740 objekata na vodovodni sistem.

Izgrađeno je pet rezervoara za vodu, te četiri pumpne stanice. U narednom periodu trebalo bi se raditi vodovodna mreža za naselje Rudnik, Zelene meraja, dio Kobiljače od osnovne škole do Zelene meraje, Buhotine, Zenik i padinski dio Kakrinjskog puta. Projektna dokumentacija je završena 2017. godine, međutim čeka se saglasnost KJKP "ViK". Radovi bi trebali koštati još tri miliona KM.

Jedan od mještana koji je dobio vodu je Muhtaz Avdagić, koji je izrazio zahvalnost Općini Ilidža.

"Veliko hvala Općini bez čijeg zalaganja ne bi danas imali vodu. Na vodu sam čekao dugo i evo konačno kao i sav normalan civilizovan svijet i mi je imamo" rekao je Avdagić.

Na području MZ Hrasnice I i II vodosnabdjevanje građana pitkom vodom je zadovoljavajuće. Obzirom da na području Hrasnice još egzistira cjevovod izgrađen od AC cijevi, koji je pored negativnog uticaja na zdravlje korisnika još i dotrajao, kao i učestali kvarovi na mreži, često je dolazilo do prekida vodosnabdjevanja. KJKP ViK je izvršilo zamjenu AC cijevi na području Hrasnice u dužini od 1800 metara. U ovoj godini planira se zamjena AC cijevi u ulici Stari drum, kao i izrada projektne dokumentacije za sanaciju i izgradnju vodovodne mreže u ulicama Bunica, Pandurica i Stari Kovači.



ranja je aktivno sudjelovanje i efikasno upravljanje razvojem Općine. Strateški plan prikazuje privredne, društvene, kulturne i sociološke aspekte sredine, te predstavlja ključni dokument za izradu programskih dokumenata. Strategijom je obuhvaćena analiza postojećeg stanja u kojem se nalazi Općina Ilidža

Polaznu osnovu strateškog planiranja obuhvata određivanje misije i vizije Općine, te općih i specifičnih ciljeva. Strategiju je uradila agencija SEVOI d.o.o. Sarajevo u saradnji sa radnom grupom Općine svim općinskim organima i službama. Predstavnik agencije je svečano uručio Strateški plan načelniku Općine Ilidža prof. dr. Senaidu Memiću.

### Otpočela sanacija krova u Domu kulture u Butmiru

**U** naselju Butmir otpočela je rekonstrukcija krova na Domu kulture. Općina Ilidža finansira ove radove. Vrijednost investicije u prvoj fazi je 70.000 KM. Radovi su povjereni firmi Eko gradnja. Rok za izvođenje radova je dva mjeseca. Osnovni razlog sanacije je prokišnjavanje objekta i pojava vlage.





## RAZGOVOR S POVODOM

## Stvoreni su preduvjeti za izgradnju tramvaj pruge Ilidža-Hranica

**R**azgovaramo sa Jasminom Voloderom, pomoćnikom načelnika za imovinsko-pravne poslove i katastar nekretnina Općine Ilidža.

*Upoznajte nas sa nadležnostima službe, jer se u javnosti često zamjenjuju teze, što bi se reklo, narod da ne luta. Šta vi u stvari možete riješiti? Koje su vaše nadležnosti?*

Pored redovnih, da kažem svakodnevnih zadataka, koji se odnose na rješavanje pitanja imovinsko pravne prirode, po zahtjevima građana, te vođenja evidencija o nekretninama, odnosno parcelama novog premjera, provođenja promjena na istim, izdavanja uvjerenja i drugih akata o kojima Služba vodi evidenciju, a trenutno provodi desetine postupaka eksproprijacije u cilju rješavanja imovinsko - pravnih odnosa, a u svrhu izgradnje komunalne infrastrukture. Radi se o postupcima koji će omogućiti izgradnju novih, modernih saobraćajnica, rekonstrukciju i proširenje postojećih, izgradnju pješačkih i biciklističkih staza, te izgradnje objekata od javnog značaja, mostova, objekata za zdravo starenje, ali i objekata za djecu sa posebnim potrebama. Nakon uspješno okončanih postupaka eksproprijacije, pristupit će se faktičkoj realizaciji projekata i naša općina, kao jedna od najdinamičnijih i najrazvijenih u cijeloj Bosni i Hercegovine, će u kratkom periodu, dobiti nove kilometre modernih saobraćajnica, bezbjednih trotoara, popularnih biciklističkih staza, te javnih objekata koji će služiti svim građanima, te posebno onim o čijim interesima i zaštiti svi zajedno, kontinuirano moramo voditi brigu.

*Recite nam molim Vas konkretne aktivnosti koje se provode na realizaciji općinskih projekata za izgradnju infrastrukture. Svjedoci smo da je naša općina u ekspanziji i da je potrebna prateća infrastruktura?*

Konkretno, uz saradnju i podršku Službe za razvoj, komunalne poslove i puteve, u toku je provođenje postupaka eksproprijacije u cilju rješavanja imovinsko pravnih odnosa u svrhu realizacije projekta,

- \* Izgradnja modernog kružnog toka, koji će se izgraditi na spoju magistralne ceste m-17 - Ibrahima Ljubovića - Bosanskih gazija;
- \* rekonstrukcija i proširenje saobraćajnice od ulaza u ulicu Stupska sa glavne gradske saobraćajnice do spoja sa ulicom Latička;
- \* izgradnja mosta preko rijeke Dobrinje, naselje Stup, ulice Tvornička i Pijačna;
- \* izgradnja nove saobraćajnice od mosta na rijeci Zujevini do ulice Mratnjevače;
- \* rekonstrukcija ulice Tuneli sa izgradnjom pješačke staze u dužini od cca 660 metara;
- \* izgradnje pješačke staze u Hranici od spoja ulica Stari drum i Stari harem do poslovnog objekta OBS u dužini od cca 500 metara,
- \* Izgradnja obostrane pješačke staze i proširenje postojeće saobraćajnice od škole „Al Amel“ do novog mosta, Ul. Osik Ilidža, MZ Osijek (dužina 2 x 600m, širina pješačke staze 1.50m);



- \* Izgradnja saobraćajnice sa pješačkim stazama u ul. Hendekua Ilidža (Stara pruga), od podvožnjaka do autobuske okretnice (dužina trase saobraćajnice iznosi cca 1235m, širina saobraćajnice 3m, obostrane, pješačke staze 1,5m)
- \* Izgradnja Centra za djecu sa posebnim potrebama u Ul. Josipa Slavenskog Ilidža (površina parcele 1401 m<sup>2</sup>)
- \* Izgradnja pješačke staze u ul. Aerodromska - Butmir (jednos-trana pješačka staza dužine 425m, širina 1,5m, pješačka staza se gradi desnom stranom saobraćajnice).
- \* Izgradnja isključne trake u naselju Osijek ul. Osik bb. (isključna traka širine 3m, jednostrana rampa širine 5m pruža se paralelno sa cestom zapadni prilaz gradu (iza objekta Autoagent doo i autokuce Kramar)
- \* Izgradnja saobraćajnice „Nova ulica Osik“ na lokaciji od podvožnjaka do novog mosta (ukupna dužina saobraćajnice 550m, kolovoz sa dvije saobraćajne trake po 3,00m, obostrano pješačke staze širine 1,5m, obostrano bankine 1,50m).
- \* Izgradnja dijela saobraćajnice u ul Ustanička i Stara Željeznička stanica (dužina saobraćajnice 170 m, ukupna širina saobraćajnice 10m)
- \* Rekonstrukcija dijela ulice IV.Viteške brigade sa izgradnjom pješačke staze (dužina saobraćajnice koja se rekonstruiše 410 m, širina 6,5 m )
- \* Izgradnja fekalnog kolektora u Rakovici, na lokalitetu Rakovica - Mostarsko raskršće (Ustanovljavanje prava služnosti) čime će se riješiti dugogodišnji problem odvođenja otpadnih voda na ovom lokalitetu
- \* Rekonstrukcija i dogradnja pješačke staze sa rješavanjem odvodnje na dijelu magistralne ceste M-5 Iloklet Gromiljalk - Blažuj u dužini od cca 320 metara, čime će se na tom dijelu magistralne ceste nivo bezbjednosti svih učesnika u saobraćaju dovesti na jedan siguran nivo (u ovom slučaju postupak eksproprijacije se radi po prijedlogu JP Autoceste Federacije BiH ).

Kao što se može primjetiti, nesporno da se radi o velikom broju postupaka za čiju realizaciju je neophodno angažovanje usposlenika cijele Službe, koji su svakodnevno u komunikaciji sa građanima i nastoje postupak eksproprijacije provesti u što kraćem roku. Za što bolje razumijevanje navedenih aktivnosti,



bitno je istaći da svaki od navedenih projekata, u sebi sadrži nekoliko desetina, pa čak i stotina nekretnina koje su predmet eksproprijacije i koje su u vlasništvu različitih lica, što dodatno uslođava provođenja samog postupka. Koristeći ovu priliku, istakao bih i nedavno završeni postupak eksproprijacije na trasi izgradnje saobraćajnice Hrasnička cesta sa tramvajskim pojasom od kružnog toka Sokolović- Kolonija do ulaza u Hrasnicu, čime su se stekli uslovi, pored izgradnje moderne saobraćajnice i za izgradnju dugo očekivane tramvajske pruge. Također u finalnoj je fazi i postupak eksproprijacije u svrhu rekonstrukcije i izgradnje potpuno novog kružnog toka na ulazu u Hrasnicu, čime će se omogućiti nesmetano odvijanje saobraćaja prema industrijskoj zoni Famos. Siguran sam da građane interesuje i postupak eksproprijacije, a koji se odnosi na dio posjeda Doma penzionera Green u Famosu, te u vezi s tim, Služba je, u tom predmetu, provela kompletan postupak i donijela rješenje o eksproprijaciji, čime su se stekli uslovi da se i taj postupak okonča u kratkom roku. Sa posebnim zadovoljstvom konstatujem da je postupak eksproprijacije nekretnina u svrhu izgradnje saobraćajnice LOT 3 - b, na potezu od kružnog toka na Mostarskom raskršću do petlje Vlakovo u potpunosti okončan i JP Autoceste Federacije BiH će vrlo brzo pristupiti izvođenju radova na izgradnji brze saobraćajnice, sa četiri saobraćajne trake, koje će povezati magistralnu cestu M-17 sa autocestom koridora Vc. Dakle, naša Općina u cjelosti opravdava epitet jedne od najrazvijenijih i najperspektivnijih općina u regionu, što ovakava dinamika razvoja potvrđuje.

**Notorna je činjenica da su evidencije o nekretninama u našoj općini često neažurne i da ne odražavaju pravo stanje te da je u toku pristupanje harmonizacija nekretnina. Kako stoji s tim i kakvi su planovi?**

S obzirom da dobijamo mnogo upita o projektu „Harmonizacije nekretnina“ koji provodi Federalna uprava za geodetske i imovinsko pravne poslove, a koja bi riješila dio problema koji se odnose na neusklađenu evidenciju nekretnina starog (gruntnog) i novog (katastarskog) premjera, Služba svakodnevno i intenzivno radi na usklađivanju takvih podataka, no zbog značajnog obima promjena koje su se desile na teritoriji naše Općine, ali i činjenice da smo u toku ratnih dejava ostali bez najvećeg dijela arhivske građe, uz podršku najvećeg rukovodstva naše lokalne zajednice, posebno općinskog Načelnika, u saradnji sa Federalnom upravom za geodetske i imovinsko pravne poslove FBiH, u toku su pripreme za Harmonizaciju katastarskih podataka za katastarsku opštinu Hrasnica koja obuhvata naselje Hrasnica, i dijelove lokaliteta Stojčevca i Vrela Bosne te Sokolović Kolonije, čime će se, ovim, pilot projektom, konačno krenuti u rješavanje dugogodišnjeg problema koji je generator za većinu problema sa kojima se suočavamo, zajedno sa našim građanima i privrednicima u svakodnevnom životu.

**Šta je s stambenom politikom?**

Osvrnuo bih se još samo na jednu novinu u Budžetu Općine Ilidža, a koja je usko vezana za stambenu politiku. Naime u ovoj godini su predviđena i sredstva za rekonstrukciju krovova objekata u vlasništvu građana i u toku je izrada Odluke i pravilnika koji će definisati način i kriterije za raspodjelu tih sredstava i na ista će moći aplicirati svi naši građani. Učešće Općine u projektima rekonstrukcije i sanacije je predviđeno u procentu od 50 posto. Pored toga, Općina je i sufinansijer u Projektu kantonalnog Ministarstva privrede (Model poboljšanja energetske efikasnosti) sa značajnim sredstvima. Nadamo se da smo bar donekle približili rad Službe našim građanima i svakako da smo otvoreni za sve sugestije, prijedloge i kritike kako bi smo nivo aktivnosti i kvaliteta usluge uskladili sa potrebama naše lokalne zajednice.

Poštovani sugrađani nadamo se da smo vam makar malo približili poslove i nadležnosti ove službe. Za sve informacije možete kontaktirati pomoćnika načelnika Jasmina Volodera, putem telefona 033 775 -715 ili lično, zgrada Općine, kancelarija broj 223, drugi sprat.



## Pripreme za Festival „Ilidža 2019“

Uveliko traju pripreme za Festival narodne muzike „Ilidža 2019“ kako bi opravdao očekivanja onih kojima je i namijenjen.

Na sastanku Organizacionog odbora 12. juna 2019. godine u prostorijama Hayat TV, televizije koja petu godinu zaredom je tehnički organizator i medijski pokrovitelj ove manifestacije dogovarane su aktivnosti kako se ne bi zabravilo koliki je značaj tradicije, kulture, očuvanja jezika, specifičnosti koju je sevdalinka kao pjesma donijela u naše živote. Ove godine Komisija za selekciju kompozicija imala je zadatak da na prvo slušanje prijavljenih pjesma izabere one koje su ušle u uži izbor. Na konkurs je prijavljeno 49 pjesama.

Zbirom bodova članova komisije za selekciju pjesama 17 ih je prošlo u takmičarsku noć ilidžanskog festivala.

Nagrade na takmičarskoj večeri festivala 2019. dijelit će se u šest kategorija i to za pobjedničku pjesmu iznosit će 5.000 KM. Za najbolji tekst predviđeno je 1.500 KM, najbolja muzika 1.500 KM, najbolji aranžman 1.500 KM, te najbolji izvođač 1.500 i nagrada publike 1.500 KM. Na ovoj manifestaciji, kako je rečeno na sastanku Organizacionog odbora, dodijelit će se nagrada za doprinos u očuvanju narodne pjesme Seji Pitiću i Ljubici Berak i njenom mužu Spasi, posthumno, posebna nagrada za autorski rad i doprinos očuvanju narodne pjesme.





## Akademija Podružnice 10, 4. motorizovanog bataljona Četvrte viteške motorizovane brigade

U Domu kulture Butmir 13. juna 2019. godine održana je svečana akademija povodom obilježavanja godišnjice Podružnice 10, 4. motorizovanog bataljona Četvrte viteške motorizovane brigade.

Tom prilikom su uručene nagrade za brojna takmičenja koja su održana u sklopu ove manifestacije, kao i zahvalnice za članove Četvrtog motorizovanog bataljona. Kao dio aktivnosti održanih u proteklom periodu izdvajaju se historijski čas sa učenicima Osme osnovne škole „Amer Čenanović“, te turniri u streljaštvu, fudbalu i odbojci sa istim. Učenici Pete osnovne škole i Osme osnovne škole „Amer Čenanović“ pisali su literarne radove o temi „Heroji moje ulice 1992-1995“ za koje su nagrađeni prigodnim novčanim nagradama. Lamija Delić- Peta osnovna škola, koja je nagrađena sa novčanom nagradom u iznosu od 100KM, drugo mjesto Amatullah Zulović- Osma osnovna škola „Amer Čenanović“, nagrada od 70 KM, te Benjamin Ičindić- Osma osnovna škola „Amer Čenanović“, nagrađen sa 50 KM.

Također, bilo je takmičenje i u streljaštvu, a najbolje djevojčice u streljaštvu su bile: Farah Šehović, drugo Džeja Tahirović, a treća Džeja Medinić. Dječaci koji su pokazali najbolje vještine u streljaštvu su: Kerim Šehović, Faris Bilalović i Muhamed Gilić. Veterani 4. Viteške motorizovane brigade



takmičili su se i u šahu i to najbolji je Džeko Škrijelj, Faruk Tahirović i Kemal Bajramović.

Uručene su i zahvalnice za članove koji su dali svoj doprinos radu Podružnice 10 uručene na održanoj svečanoj akademiji su: Nazif Laković-posthumno, Adem Agović, Bećir Polovina, Muhamed Saračević, Safet Čenanović, Ruždija Bjelak, Midhat Bajrić, Dževad Džanko, Kasim Čenanović, Himzija Aganović, Ibro Suljić, Muradif Salihagić, Refik Hadžić, Hajrudin Mahmutović i Osman Horo.

Izet Hurić, predsjednik Podružnice 10 - 4. motorizovanog bataljona izrazio je zahvalnost Osmoj osnovnoj školi „Amer Čenanović“ i Petoj osnovnoj školi, kao i KUD „Ekrem Mujkić“ koji im svake godine nesebično pružaju podršku u održavanju navedenih aktivnosti.



## Obilježena godišnjica odbrane Donjeg Kotorca

I ove, kao i predhodnih godina u prisustvu boraca, ratnih vojnih invalida, članova porodica šehida i poginulih boraca, učenika, rodbine i prijatelja, 13. juna 2019. godine na dostojanstven način memorijalno-historijskim susretom obilježena je godišnjica „Odrbane Donjeg Kotorca“. Predstavnici boračkih udruženja i Općine Ilidža položile su cvijeće na spomen-obilježje u Donjem Kotorcu i na mezarje i spomen obilježje u Butmiru, a proučena je i Hatma dova šehidima i umrlim borcima Armije RBiH. Na taj način je odatu dužno poštovanje braniocima Donjeg Kotorca i cijele Bosne i Hercegovine.

Okupljeni su evocirali uspomene na taj dan kada se vodila sudbonosna bitka i ključna odbrana ovog dijela ilidžanske teritorije, čijim zauzimanjem Sarajevo bi bilo potpuno odsječeno i blokirano, a postojanje BiH bilo bi upitno. Ovaj značajan datum je ujedno i godišnjica formiranja 4. Motorizovanog bataljona 4. Viteške motorizovane brigade i Dan mjesne zajednice Donji Kotorac koji su tradicionalno obilježeni Svečanom akademijom koja je održana u Domu kulture u Butmiru. Organizovana su i sportska takmičenja u šahu, streljaštvu, malom nogometu i odbojci. Učenici Osme osnovne škole „Amer Čenanović“ izveli su prigodan program.

## Uručeni ugovori za (su) finansiranje projekata iz oblasti sporta, kulture i obrazovanja

Načelnik Općine Ilidža prof. dr. Senaid Memić 28. jula 2019. godine uručio je ugovore za (su)finansiranje projekata iz oblasti sporta, kulture i obrazovanja iz budžeta Općine za 2019. godinu. Na osnovu definisanih kriterija za dodjelu sredstava iz budžeta na javni poziv mogla su aplicirati udruženja, klubovi i sportska društva registrovana u BiH, sa sjedištem na području općine Ilidža ili na području druge općine, pod uslovom da se projekat realizuje u interesu građana općine Ilidža i u potpunosti na području općine Ilidža. Na raspisani javni poziv prijavilo se 93 aplikanta sa 125 projektna prijedloga. Na prijedlog Komisije za odabir projekata koja je izvršila ocjenu projekata općinski načelnik je donio odluku o (su)finansiranju 95 projekata za koje iz budžeta Općine Ilidža izdvojeno 150.000 KM. Odobrena su sredstva za 29 projekata iz oblasti sporta u iznosu od 50.000 KM, kulture 50.000 KM za 28 projekata i 50.000 KM za 38 projekata iz obrazovanja.





# Preventivnim djelovanjem i podizanjem svijesti građana protiv nasilja u porodici

Na osnovu Plana implementacije Gender akcionog plana Općine Ilidža za 2018. godinu za čiju provedbu su zadužene Komisija za izbor, imenovanja i pitanja ravnopravnosti spolova i Komisija za zaštitu ljudskih prava, predstavke i prijedloge Općinskog vijeća formirani su radni timovi za pojedinačne strateške ciljeve. Za implementaciju strateškog cilja "Povećati uključenost građana/ki u suzbijanju i sprečavanju rodno motivisanog nasilja" formiran je radni tim koji čine Amila Gadžo, Amel Pintol, Hamida Memišević i Emina Čolak. U saradnji sa NVO KANTAR TNS, Službom za rad, socijalna pitanja, zdravlje i raseljena lica i Službom za obrazovanje, kulturu, sport i informisanje provedeno je ispitivanje mišljenja javnosti o pitanjima jednakosti i ravnopravnosti spolova o rodno zasnovanom nasilju u porodici. Na osnovu analize rezultata ispitivanja, kao jedan od zaključaka o narednim aktivnostima s ciljem sprečavanja rodno zasnovanog nasilja je medijska kampanja u trajanju do šest mjeseci koja predviđa intervju sa svim institucijama uključenim u provedbu ovog strateškog cilja.



Prvi u nizu planiranih razgovora obavljen je sa magisticom kriminalističkih nauka, Dželimom Kepeš uposlenicom MUP-a Kantona Sarajevo, Odjeljenje kriminalističke policije Ilidža koja radi na poslovima istražitelja.

**Recite nam koliko je u prošloj godini prijavljeno krivičnih djela nasilja u porodici? U poređenju sa prethodni pet godina da li ovaj krivičnih djela ima tendenciju rasta ili opadanja?**

Petoj Policijskoj upravi Ilidža, Odjeljenju kriminalističke policije u 2018. godini prijavljeno je 60 krivičnih djela iz člana 222. KZ Federacije BiH, nasilje u porodici. Podaci za posljednjih pet godina za prijavljena krivična djela nasilja u porodici variraju tako da ne možemo reći da li je došlo do povećanja ili opadanja ovog vida krivičnog djela. Broj prijavljenih slučajeva je recimo za 2014. godinu 78, za 2015. je 62, za 2016. iznosi 54, a za 2017. godinu taj broj je 69.

**Sa kojim institucijama sarađujete po ovom pitanju?**

Po pitanju ove problematike sarađujemo sa Kantonalnim tužilaštvom Kantona Sarajevo, Općinskim sudom u Sarajevu, Policijskim upravama Kantona Sarajevo, Sektorom kriminalističke policije Uprave policije MUP-a KS, Sektorom uniformisane policije Uprave policije MUP-a KS, Službom socijalne zaštite i medicinskim ustanovama.

**Možete li nam prokomentarisati činjenicu da prema istraživanju koje smo proveli da 42,3 posto građana Ilidže ne zna da postoji Zakon o nasilju u porodici i nasilju nad ženama?**

Podizanjem svijesti građana, posebno djece kroz project rada policije u zajednici i kroz druge projekte u saradnji sa vladinim i nevladinim sektorom i opštinom, podjelom letaka, medijskom kampanjom i organizovanjem radionica iz ove oblasti na nivou opština građani bi se upoznali sa Zakonom o nasilju u porodici.

**Prema istraživanju 70 posto stanovnika općine Ilidža smatra da su žene najčešće žrtve nasilja u porodici. Da li stvarna situacija odgovara ovakvoj percepciji građana?**

Broj lica koja su štićena zaštitnim mjerama prema spolu osobe koja je zaštićena zaštitnom mjerom (žrtva) u prošloj godini je bilo 103 žene i 69 muškaraca.

**Smatrate li da ste dovoljno osposobljeni za adekvatnu reakciju po prija nasilja? Koliko su policajke važne u slučaju prijave nasilja nad ženama?**

Svi policijski službenici MUP-a Kantona Sarajevo, bez obzira na spol provode mjere i zakone prema Krivičnom zakonu Federacije BiH u kojem su propisana sva krivična djela, kao i djela iz član 222.(nasilje u porodici), provode mjere i postupaju po Zakonu o zaštiti od nasilja u porodici. Prilikom prijave nasilja u porodici nije presudan spol policijskog službenika, sve se provodi zakonito i profesionalno.

**Da li imate podatke koliko je osoba sa područja općine Ilidža osuđeno po ovom krivičnom djelu u prošloj godini?**

Policijska uprava Ilidža je u 2018. godini je nadležnom tužilaštvu Kantona Sarajevo podnijelo Izvještaj o počinjenim krivičnim djelima nasilje u porodici za 60 osumnjičenih lica. Podatke o presuđanim predmetima po ovom krivičnom djelu posjeduje Tužilaštvo Kantona Sarajevo.

Ovim putem obavještavamo građane općine Ilidže da nasilje u porodici mogu prijaviti na broj telefona 1265.

**Za Četvrtu gimnaziju  
347.900,40 KM,  
a za Četvrtu osnovnu  
školu 180.191,95 KM**

Uzgradi Kantona Sarajevo 13.juna 2019. godine potpisan je Sporazum o povećanju energetske efikasnosti za 24 javna objekta na području KS. Radi se o nastavku veoma uspješne saradnje Ministarstva prostornog uređenja, građenja i zaštite okoliša Kantona Sarajevo sa UNDP-ijem i Vladom Švedske na realizaciji projekta "Zeleni ekonomski razvoj".

"Ovaj sporazum za sredstva koja je obezbijedio Kanton u iznosu od 3,5 miliona KM, a ostalo je grant švedske vlade, što je sveukupno 6.077.439,47 KM je veoma bitan s ciljem energetske sanacije, a sve s ciljem smanjenja negativnih efekata na kvalitet zdravlja. Općina Ilidža je u ovom projektu uložila 166.765,26 KM, rekao je ministar prostornog uređenja Damir Filipović

Za Općinu Ilidža sporazum je potpisao načelnik prof.dr Senaid Memić, a sporazum se odnosi na Četvrtu gimnaziju i JU Četvrtu osnovna škola.

Za Četvrtu gimnaziju je predviđeno 347.900,40 KM a za Četvrtu osnovnu školu 180.191,95 KM.



## Nagrađeni najuspješniji učenici

Svečana dodjela novčanih nagrada i diploma najuspješnijim učenicima ilidžanskim osnovnih i srednjih škola koji su na općinskom, kantonalnom, federalnom i državnom takmičenju ostvarili najbolje rezultate, upriličena je 24. juna 2019. godine u Općini Ilidža.

Nagrade su pobjednicima takmičenja iz matematike, fizike, informatike, geografije, te bosanskog i književnosti te drugih predmeta, uručili načelnik Općine Ilidža prof.dr. Senaid Memić i Denis Muhović, pomoćnik općinskog načelnika za obrazovanje, kulturu, sport i informisanje uputivši im iskrene čestitke na postignutom uspjehu.

„Vi ste naš najveći ponos i biti prvi, drugi, treći i najbolji nije lako. Vaši rezultati i vaš uspjeh je nešto što nas raduje, vi ste naš najveći resurs. Nastavite biti tako dobri u školovanju, a svi oni koji dobro uče mogu imati i stipendiju” rekao je načelnik Memić.

Denis Muhović je naglasio da je ovom prilikom nagrađeno 90 učenika, te je iz budžeta za njihove nagrade izdvojeno oko devet hiljada KM.



## Donirane 364 knjige

Općina Ilidža kontinuirano realizuje projekt pomoći bibliotekama u obogaćivanju knjižnog fonda nabavkom novih izdanja i literature za mlade ljude. Tim povodom načelnik Općine Ilidža prof.dr. Senaid Memić 11. juna uručio je 364 knjige u svrhu pomoći bibliotekama na području ove općine, JU Biblioteke Sarajevu-Bibliotečkom odjeljenju Ilidža, kao i biblioteka u sastavu Javne ustanove za kulturu i rekreaciju Hrasnica-Ilidža, JU Četvrta gimnazija Ilidža i JU Srednja tehnička škola grafičkih tehnologija, dizajna i multimedije.

„Općina Ilidža u skladu sa strategijama prema mladima, realizuje projekt pomoći bibliotekama u obogaćivanju knjižnog fonda nabavkom novih izdanja i literature za mlade ljude. Postojeći knjižni fond u bibliotekama ne može zadovoljiti potrebe mladih ni kvantitetom ni kvalitetom. Tako je Općina Ilidža i ove godine u svrhu pomoći bibliotekama u poboljšanju knjižnog fonda nabavila ove knjige, a nadam se potrebne knjige” izjavio je načelnik Memić.

“Knjige će zadovoljiti interes mladih, a izabrane su po preporuci naših čitatelja”, rekla je Amina Čenanović-Sadiković, bibliotekar JU Biblioteke Sarajevo.

Za nabavku knjiga Općina je izdvojila 5.000 KM.



„Dragi naši učenici, želimo vam puno sreće i uspjeha u daljem školovanju i želimo da se što više nadmećete u znanju i da budete što uspješniji u tome. Uspjesi ostvareni na ovim takmičenjima su rezultat zajedničkog rada, truda i zalaganja kako učenika, tako i nastavnika koji su vas pripremali za takmičenje“, dodao je načelnik Memić.

Među učenicima koji su ostvarili uspjeh na takmičenjima je i Arija Joldo iz Šeste osnovne škole.

Ona je na kantonalnom takmičenju iz njemačkog osvojila prvo mjesto.

Kaže da joj je njemački jezik kao predmet uvijek bio interesantan.

Međutim, za takmičenje treba puno rada i truda.

„Sve to se na kraju isplati. Vrlo bitno je da lokalna zajednica u kojoj živim brine o obrazovanju, a novčane nagrade jako dobro dođu“, kaže Arija. Općina Ilidža je osigurala novčane nagrade u iznosu za prvo mjesto na državnog nivou 200 KM, federalnom 150, kantonalnom 120, a općinskom takmičenje 100 KM.



## Upisano 619 prvačića

Upis u prvi razred osnovne škole obavlja se u aprilu i augustu. Nakon prvog upisnog roka u aprilu, za predstojeću školsku 2019/2020. godinu, u prve razrede 13 osnovnih škola na području općine Ilidža, od čega je deset osnovnih, te Područna osnovna škola Stup, Osnovna škola Mehmed Handžić i PU Richmond International Primary School upisano je 619 prvačića i to 319 dječaka i 294 djevojčice.

Osnovno obrazovanje je obavezno za svu djecu do navršene 15. godine života, odnosno do završetka osnovne škole. Školskim obveznikom smatra se dijete koje je do 1. marta tekuće godine navršilo pet i po godina života.



## Svečano otvoren kamp „Košarka bez granica“ na Bjelašnici

Simboličnim podizanjem zastava klubova u nedjelju 30. juna na Bjelašnici svečano je otvoren košarkaški kamp „Košarka bez granica“. Učesnici kampa su dječaci, članovi košarkaških klubova Ilidža, BBY i Rolling. Kampu prisustvuje 67 dječaka različitih uzrasta od šest do 17 godina podijeljenih u pet radnih grupa. Kamp traje od 30. juna do 7. jula a učesnici su smješteni u hotelu Han. Po programu svakog dana održavaju se jutarnji i večernji treninzi. Pored treninga organizovana su predavanja i druženje sa promotorima kampa, a to su poznati mladi košarkaši Adnan Arslanagić i Ajdin Penava. Osim treninga i takmičenja biće izlet, kino projekcije, radionice o raznim temama vezanim za sport, zdravom ishranom, druženja, zabave, ali i ugodne hotelske atmosfere i dobre hrane.



## Na turniru u šahu učestvovalo 16 igrača

U organizaciji šahovskog kluba „Igman“ Ilidža, 23. juna 2019. godine u prostorijama šahovskog kluba Boana Sarajevo, održan je Kup u ubrzanom (Rapid) šahu za 2019. godinu. Na turniru je učestvovalo 16 igrača iz kantona sarajevo koji su igrali po Švicarskom sistemu tempo igre 5 minuta po igraču, a odigrano je 11 kola. Prvo mjesto osvojio je Halid Strinić sa osvojenih 12 bodova, drugo Rijad Burović sa 10,5 bodova i treće Emir Dizdarević takođe sa osvojenih 10,5 bodova. Sudija turnira je bio Mirza Miralem. Pobjednicima su uručene prigodne nagrade.



## Bajramski paketići za djecu bez roditelja

Vrijedne aktivistice Udruženja „Zlatna ruka“ Ilidža realizovale su još jednu humanitarnu akciju kojom su obradovali najmlađe. Ovog puta su osigurali 57 bajramskih paketića za djecu bez roditelja. Svečana podjela paketića mališanima organizovana je u prostorijama mjesne zajednice Stup II gdje su im uz druženja sa članicama udruženja uručeni bajramski paketići. Paketiće su donirali Medina i Maida Alijagić i Fikret Erović.



## Održan Festival sporta u Hrasnici

Drugi Festival sporta, održan je 14, 15. i 16. juna u Hrasnici. Svečano ga je otvorio predsjednik Košarkaškog saveza Bosne i Hercegovine Mirza Teletović.

Nekadašnji kapiten naše najbolje košarkaške selekcije dječacima i djevojčicama koji su se takmičili su fudbalu, košarci i odbojci i poželio je mnogo sreće, te mladim sportistima i sportistkinjama objasnio značaj bavljenja sportom.

Festival je okupio oko 1000 učesnika koji su se takmičili u fudbalu, košarci, rukometu, odbojci i atletici.

Na ovom međunarodnom takmičenju Festivalu sporta, svi timovi su bili oslobođeni plaćanja kotizacije.

“Posebno smo ponosni što smo se izborili da takmičenje bude besplatno i iskreno se nadamo da će tako biti i u budućnosti, rekao je Emir Memić predsjednik Organizacionog odbora Festivala sporta. Osim takmičarskog održan je i revijalni dio.

